



Broj: 01-50-1-15-55/09
Sarajevo, 10. juni 2009. godine

Z A P I S N I K
55. sjednice Predstavničkog doma
Parlamentarne skupštine Bosne i Hercegovine,
održane 10. juna 2009. godine

Sjednica je počela u 10 sati. Prisustvovalo je 39 poslanika. Odsustvo su opravdali: Adem Huskić, Azra Alajbegović i Jovan Todorović.

Iz Vijeća ministara BiH sjednici su prisustvovali predsjedavajući Vijeća ministara BiH Nikola Špirić, ministri: Sredoje Nović, Tarik Sadović i Bariša Čolak, te zamjenici ministara Mijo Krešić i Vilim Primorac.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, EUPM-a, USAID PSP u BiH, Ambassade Velike Britanije te nevladine organizacije Centri civilnih inicijativa.

Predsjedavajući Beriz Belkić je na početku sjednice informirao Dom da je Vijeće ministara BiH usaglasilo tekst himne Bosne i Hercegovine, te da će biti potrebno usvojiti Zakon o izmjenama i dopunama Zakona o himni BiH. Predsjedavajući je zatim obrazložio izmjene i dopune predloženog dnevnog reda koji je usaglašen na sjednici Kolegija u proširenom sastavu.

U okviru rasprave o dnevnom redu Rifat Dolić predložio je da se dnevni red dopuni tačkom: Izvještaj Vijeća ministara BiH o realizaciji obaveza iz Mape puta za liberalizaciju viznog režima za građane Bosne i Hercegovine. Podsjetio je na zaključak sa 50. sjednice Doma, usvojen povodom razmatranja Plana aktivnosti za ispunjavanje obaveza i preporuke Evropske komisije u vezi s Mapom puta za liberalizaciju viznog režima, koji glasi: "Zadužuje se Vijeće ministara BiH da svaki mjesec podnosi Predstavničkom domu izvještaj o realizaciji obaveza iz Mape puta za liberalizaciju viznog režima". Predložio je da se ova tačka uvrsti u dnevni red bez obzira na to da li će Vijeće ministara BiH u toku sjednice podnijeti traženi izvještaj.

Predsjedavajući je podsjetio da Poslovnik Doma predviđa da je za svaku tačku potrebno dostaviti materijal koji će biti osnova za raspravu. Kazao je da je Kolegij u stalnom kontaktu s Vijećem ministara BiH u vezi s prikupljanjem informacija o ispunjavanju obaveza iz Mape puta, te da predsjedavajući Vijeća ministara BiH, u okviru rasprave o zakonima koji su na dnevnom redu po hitnom postupku, može dati dodatne informacije. Predložio je da se ova tačka uvrsti u dnevni red naredne sjednice kako bi se pribavio traženi materijal.

Rifat Dolić insistirao je da se glasa o prijedlogu za dopunu dnevnog reda.

Dom je prihvatio prijedlog za dopunu dnevnog reda sa 20 glasova „za“ (iz Federacije BiH 14, iz Republike Srpske šest), devet „protiv“ i jednim „suzdržanim“ glasom. Predsjedavajući je kazao da će ovaj izvještaj biti razmatran kao 20. tačka dnevnog reda.

Predsjedavajući je za 55. sjednicu Predstavničkog doma konstatirao sljedeći

D N E V N I R E D

1. Usvajanje Zapisnika 54. sjednice Predstavničkog doma;
2. Poslanička pitanja:
 - a) Komentari na dobivene odgovore,
 - b) Nova poslanička pitanja,

3. Zahtjev Vijeća ministara BiH za razmatranje Prijedloga zakona o međunarodnoj pravnoj pomoći u krivičnim stvarima po hitnom postupku, u skladu s članom 127. Poslovnika;
4. Zahtjev Vijeća ministara BiH za razmatranje Prijedloga zakona o graničnoj kontroli po hitnom postupku, u skladu s članom 127. Poslovnika;
5. Zahtjev Vijeća ministara BiH za razmatranje Prijedloga zakona o kontroli kretanja oružja i vojne opreme po hitnom postupku, u skladu s članom 127. Poslovnika;
6. Zahtjev Vijeća ministara BiH za razmatranje Prijedloga zakona o sprečavanju pranja novca i finansiranja terorističkih aktivnosti po hitnom postupku, u skladu s članom 127. Poslovnika;
7. Prijedlog zakona o izmjenama i dopunama Zakona o službi u Oružanim snagama BiH (drugo čitanje);
8. Prijedlog zakona o kontroli vanjskotrgovinskog prometa robe i usluga od strateške važnosti za sigurnost BiH (drugo čitanje);
9. Prijedlog zakona o parlamentarnom vojnom povjereniku BiH, predlagači: poslanici Šefik Džaferović i Adem Huskić (drugo čitanje);
10. Izjašnjavanje o Prijedlogu zakona o poštama BiH (drugo čitanje),
11. Prijedlog zakona o upotrebi znakovnog jezika, predlagači: poslanici Beriz Belkić, Milorad Živković i Niko Lozančić (drugo čitanje),
12. Prijedlog zakona o izmjenama i dopunama Zakona o osiguranju depozita u bankama BiH (prvo čitanje),
13. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku (prvo čitanje);
14. Prijedlog zakona o dopuni Zakona o osnovama sigurnosti saobraćaja na putevima u BiH, predlagač: Dom naroda Parlamentarne skupštine BiH (prvo čitanje);
15. Izvještaj komisije Kolegija o nastojanju za postizanje saglasnosti o Prijedlogu zakona o postupku zaključivanja i izvršavanja međunarodnih ugovora (drugo čitanje),
16. Izvještaj Zajedničke komisije oba doma o usaglašavanju teksta Zakona o izmjenama i dopunama Zakona o finansiranju institucija BiH;
17. Informacija o radu Tužilaštva BiH za 2008. godinu (podnosilac: Tužilaštvo BiH);
18. Izvještaj o radu:
 - a) BHRT-a za 2008. godinu
 - b) Upravnog odbora RTVBiH (BHRT) za 2007. i 2008. godinu;
19. Izvještaj o finansijskom poslovanju BHRT-a za 2008. godinu, s pregledom korekcija Finansijskih izvještaja BHRT za 2007. i 2008. godinu;
20. Izvještaj Vijeća ministara BiH o realizaciji obaveza iz Mape puta za liberalizaciju viznog režima za građane Bosne i Hercegovine;
21. Informacija Ombudsmena za ljudska prava BiH o zatečenom stanju u 2008. godini i aktivnostima preduzetim u 2009. godini;
22. Informacija o stanju sigurnosti u Bosni i Hercegovini u 2008. godini;
23. Informacija Ministarstva sigurnosti BiH o stanju sigurnosti novinara u Bosni i Hercegovini (realizacija usvojenog zaključka sa 47. sjednice Doma, održane 4. marta 2009.);
24. Potvrđivanje odluka predsjedavajućeg Vijeća ministara BiH o imenovanju:
 - a) Mladena Simića za zamjenika ministra komunikacija i prometa BiH,
 - b) Živka Marjanca za zamjenika ministra odbrane BiH za politiku i planiranje;
25. Imenovanje članova u Posebnu istražnu komisiju (usvojen zaključak na 52. sjednici Doma, održanoj 29. aprila 2009.);
26. Izjašnjavanje Doma o prijedlogu Zajedničkog kolegija oba doma Parlamentarne skupštine BiH da se kolegiji oba doma obrate visokom predstavniku za BiH radi davanja mišljenja o Zaključku Zajedničke komisije za ljudska prava, prava djeteta, mlade, imigraciju, izbjeglice, azil i etiku;
27. Davanje saglasnosti za ratifikaciju:
 - a) Sporazuma o ekonomskoj saradnji između Vijeća ministara BiH i Vlade Republike Srbije,
 - b) Sporazuma između Vijeća ministara BiH i Vlade Crne Gore o provođenju graničnih provjera na zajedničkim graničnim prijelazima,

- c) Aneksa II. Sporazuma između Bosne i Hercegovine i Kraljevine Norveške o finansiranju projekta u korist pravosuđa i/ili sudova i tužilaštava u BiH,
- d) Dodatnog protokola uz Krivičnopravnu konvenciju protiv korupcije (ETS 191), Strasbourg, 15. maja 2003.,
- e) Evropske konvencije o obavještenjima o stranom pravu s Dodatnim protokolom,
- f) Amandmana na Konvenciju o osnivanju Vijeća za carinsku saradnju,
- g) Protokola između Ministarstva sigurnosti BiH i MUP-a Republike Srbije o provođenju zajedničkih patrola uz zajedničku državnu granicu,
- h) Protokola između Ministarstva sigurnosti BiH i MUP-a Republike Srbije o održavanju redovnih sastanaka predstavnika na državnom, regionalnom i lokalnom nivou.

Ad. 1. Usvajanje Zapisnika 54. sjednice Predstavničkog doma

Predsjedavajući je konstatirao da je Zapisnik dostavljen poslanicima.

Zapisnik 54. sjednice usvojen je sa 25 glasova „za“ (iz Federacije BiH 18, iz Republike Srpske sedam), jednim „protiv“ i bez „suzdržanih“ glasova.

Ad. 2. Poslanička pitanja

Predsjedavajući je kazao da su do ove sjednice odgovore dobili poslanici: Šefik Džaferović, Hadži Jovan Mitrović, Šemsudin Mehmedović, Halid Genjac, Milica Marković i Željko Kuzmanović.

Odgovore su komentirali Šefik Džaferović i Hadži Jovan Mitrović.

Nije bilo pitanja u okviru komentara na odgovore.

Postavljena su nova poslanička pitanja kako slijedi:

Halid Genjac:

“Kada će Vijeće ministara BiH podnijeti službenu aplikaciju da bi BiH postala kandidat za članstvo u Evropskoj uniji i šta je Vijeće ministara BiH uradilo na pripremi službene aplikacije kako bi ona bila kredibilna i prihvatljiva za Evropsko vijeće?”

Hadži Jovan Mitrović:

“Treba li zakoni, pa i Zakon o sukobu interesa, biti u skladu s važećim Ustavom BiH, Međunarodnim paktom o građanskim i političkim pravima i Izbornim zakonom BiH? Da ili ne?”

Remzija Kadrić:

“1. Koje aktivnosti Vijeće ministara BiH preduzima po pitanju sklapanja međunarodnih ugovora o imovinskopравnim odnosima BiH sa Srbijom i Hrvatskom?”

2. U kojim sve slučajevima je Pravobranilaštvo BiH ustajalo tužbama radi zaštite prava na integritet i pravni kontinuitet imovine države BiH?

3. Iz kojih razloga je Ured za žalbe BiH odbio žalbu Javnog preduzeća BH Pošta (uz napomenu da je tu istu žalbu Konkurencijsko vijeće kasnije usvojilo) na Odluku za obavljanje rezerviranih poštanskih usluga od privatnog poštanskog operatera “MHS Sarajevo”, a za potrebe Sarajevogasa?”

Husein Nanić:

„Kakav je status inicijative da se za počasnog konzula u Republici Sloveniji imenuje Smail Festić“?

Rifat Dolić:

„1. Koliko iznose dospjele a neizmirene obaveze koncesionara prema budžetima na svim nivoima vlasti u BiH, u skladu sa zakonima o koncesijama u BiH i potpisanim ugovorima o

koncesijama? Ko su 20 najvećih dužnika po osnovu koncesija, računajući sve nivoe i kolika su njihova pojedinačna dugovanja? Šta su nadležne institucije preduzele u svrhu naplate ovih potraživanja?

2. Kojim propisima je u BiH reguliran segment finansiranja i kontrole finansiranja vjerskih zajednica?“

Milorad Živković:

„1. Da li je Vijeće ministara BiH zadužilo ministra sigurnosti Tarika Sadovića da otputuje u Lion i sastane se s generalnim sekretarom Interpola gosp. Ronaldom K. Nobleom i razgovara u ime BiH o raspisavanju i dostavljanju potjernica u slučaju Dobrovoljačka? Koga je i na osnovu koje platforme ministar Sadović predstavljao u Lionu i čije je interese zastupao i da li su o njegovim istupima, putovanjima i jednostranim lobiranjima upoznati predsjedavajući Vijeća ministara BiH, njegovi zamjenici, zamjenik ministra sigurnosti i Ured Interpola u BiH?

2. Da li je legalno i ako jeste, na osnovu kojeg ugovora ili zakona, prisluškivanje građana, zvaničnika institucija u BiH od „međunarodnih obavještajnih organizacija“? Koje su to organizacije i ko ih finansira?“

Ad. 3., 4., 5. i 6.

U uvodnim napomenama predsjedavajući je podsjetio da je riječ o zakonima koji su predviđeni Mapom puta za liberalizaciju viznog režima za građane BiH.

Nije bilo rasprave o zahtjevima za hitni postupak, a nakon usvajanja zahtjeva obavljena je jedinstvena rasprava o svim zakonima u kojoj su učestvovali: Milorad Živković, Jozo Križanović, Drago Kalabić i Momčilo Novaković.

Rezultati glasanja o zahtjevima za hitni postupak i zakonima su sljedeći:

Zahtjev Vijeća ministara BiH za razmatranje Prijedloga zakona o međunarodnoj pravnoj pomoći u krivičnim stvarima po hitnom postupku, u skladu s članom 127. Poslovnika, usvojen je sa 29 glasova „za“ (iz Federacije BiH 21, iz Republike Srpske osam), bez glasova „protiv“ i četiri „suzdržana“ glasa, a Prijedlog zakona usvojen je sa 34 glasa „za“ (iz Federacije BiH 22, iz Republike Srpske 12), bez glasova „protiv“ i jednim „suzdržanim“ glasom.

Zahtjev Vijeća ministara BiH za razmatranje Prijedloga zakona o graničnoj kontroli po hitnom postupku, u skladu s članom 127. Poslovnika, usvojen je sa 31 glasom „za“ (iz Federacije BiH 22, iz Republike Srpske devet), bez glasova „protiv“ i četiri „suzdržana“ glasa, a Prijedlog zakona usvojen je sa 34 glasa „za“ (iz Federacije BiH 22, iz Republike Srpske 12), bez glasova „protiv“ i jednim „suzdržanim“ glasom.

Zahtjev Vijeća ministara BiH za razmatranje Prijedloga zakona o kontroli kretanja oružja i vojne opreme po hitnom postupku, u skladu s članom 127. Poslovnika, usvojen je sa 30 glasova „za“ (iz Federacije BiH 22, iz Republike Srpske osam), bez glasova „protiv“ i pet „suzdržanih“ glasova, a Prijedlog zakona usvojen je sa 34 glasa „za“ (iz Federacije BiH 22, iz Republike Srpske 12), bez glasova „protiv“ i jednim „suzdržanim“ glasom.

Zahtjev Vijeća ministara BiH za razmatranje Prijedloga zakona o sprečavanju pranja novca i finansiranja terorističkih aktivnosti po hitnom postupku, u skladu s članom 127. Poslovnika, usvojen je sa 31 glasom „za“ (iz Federacije BiH 22, iz Republike Srpske devet), bez glasova „protiv“ i četiri „suzdržana“ glasa, a Prijedlog zakona usvojen je sa 33 glasa „za“ (iz Federacije BiH 21, iz Republike Srpske 12), bez glasova „protiv“ i jednim „suzdržanim“ glasom.

Ad. 7. Prijedlog zakona o izmjenama i dopunama Zakona o službi u Oružanim snagama BiH (drugo čitanje)

Predsjedavajući je u uvodnim napomenama rekao da je nadležna komisija usvojila zakon u predloženom tekstu, a da u plenarnoj fazi nije bilo amandmana.

Nije bilo rasprave.

Prijedlog zakona o izmjenama i dopunama Zakona o službi u Oružanim snagama BiH usvojen je u drugom čitanju jednoglasno - sa 35 glasova „za“ (iz Federacije BiH 23, iz Republike Srpske 12).

Ad. 8. Prijedlog zakona o kontroli vanjskotrgovinskog prometa robe i usluga od strateške važnosti za sigurnost BiH (drugo čitanje)

Predsjedavajući je kazao da je nadležna komisija usvojila jedan amandman, te da u plenarnoj fazi nije bilo amandmana.

Nije vođena rasprava.

Prilikom glasanja, „za“ je bilo 25 poslanika (iz Federacije BiH 23, iz Republike Srpske dva), jedan „protiv“ i devet „suzdržanih“. Predsjedavajući je konstatirao da nema potrebne entitetske većine i da će Kolegij naknadno obaviti usaglašavanje o Prijedlogu zakona u drugom čitanju.

Ad. 9. Prijedlog zakona o parlamentarnom vojnom povjereniku BiH, predlagači: poslanici Šefik Džaferović i Adem Huskić (drugo čitanje)

Predsjedavajući je podsjetio da je nadležna komisija usvojila dva amandmana, te da ni na ovaj prijedlog zakona nije bilo amandmana u plenarnoj fazi.

Nije bilo rasprave o ovom prijedlogu zakona.

Dom je, sa 32 glasa „za“ (iz Federacije BiH 22, iz Republike Srpske 10), bez glasova „protiv“ i tri „suzdržana“, usvojio Prijedlog zakona o parlamentarnom vojnom povjereniku BiH.

Ad. 10. Izjašnjavanje o Prijedlogu zakona o poštama BiH (drugo čitanje)

Predsjedavajući je u uvodnim napomenama kazao da je na prošloj sjednici odgođeno izjašnjavanje o Prijedlogu zakona u drugom čitanju i da je nadležna komisija zadužena da učini dodatne napore i konsultacije u pravcu usaglašenih rješenja. Kako taj posao nije do kraja završen, a do usaglašenih rješenja je moguće doći, predsjedavajući je predložio da se izjašnjavanje ponovo odgodi.

Sa 32 glasa „za“ (iz Federacije BiH 20, iz Republike Srpske 12), bez glasova „protiv“ i tri „suzdržana“ glasa, Dom je odgodio izjašnjavanje o Prijedlogu zakona o poštama BiH za narednu sjednicu.

Ad. 11. Prijedlog zakona o upotrebi znakovnog jezika, predlagači: poslanici Beriz Belkić, Milorad Živković i Niko Lozančić (drugo čitanje)

Predsjedavajući je kazao da je nadležna komisija prihvatila zakon u predloženom tekstu, a da amandmana nije bilo ni u plenarnoj fazi. Nije bilo rasprave.

Prijedlog zakona usvojen je u drugom čitanju sa 32 glasa „za“ (iz Federacije BiH 21, iz Republike Srpske 11), bez glasova „protiv“ i tri „suzdržana“ glasa.

Ad. 12. Prijedlog zakona o izmjenama i dopunama Zakona o osiguranju depozita u bankama BiH (prvo čitanje)

Nije bilo rasprave ni o ovoj tački dnevnog reda.

Dom je, sa 31 glasom „za“ (iz Federacije BiH 22, iz Republike Srpske devet), bez glasova „protiv“ i četiri „suzdržana“, usvojio Prijedlog zakona o izmjenama i dopunama Zakona o osiguranju depozita u bankama BiH u prvom čitanju.

Ad. 13. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, predlažać: Zajednička komisija za ljudska prava, prava djeteta, mlade, imigraciju, izbjeglice, azil i etiku (prvo čitanje)

Nakon uvodnih napomena predsjedavajućeg kratko je diskutirao Branko Dokić.

Prijedlog zakona iz ove tačke usvojen je u prvom čitanju jednoglasno – sa 35 glasova „za“ (iz Federacije BiH 23, iz Republike Srpske 12), a time i zaključak iz mišljenja Komisije za saobraćaj i komunikacije, koji glasi:

„S obzirom da Ministarstvo komunikacija i prometa BiH priprema sveobuhvatne izmjene i dopune Zakona o osnovama sigurnosti saobraćaja na putevima u BiH, Predstavnički dom sugerira da se moguće inicijative za izmjene ovog zakona prethodno upute Ministarstvu komunikacija i prometa BiH.“

Ad. 14. Prijedlog zakona o dopuni Zakona o osnovama sigurnosti saobraćaja na putevima u BiH, predlažać: Dom naroda Parlamentarne skupštine BiH (prvo čitanje)

Predsjedavajući je dao uvodne napomene.

U ime predlažaća Zakona kratko obrazloženje dala je delegat Dušanka Majkić.

U raspravi su učestvovali: Branko Dokić, Momčilo Novaković, Beriz Belkić, Husein Nanić i Slavko Jovičić.

Prilikom glasanja, „za“ su bila tri poslanika, „protiv“ 30 i dva „suzdržana“. Predsjedavajući je konstatirao da nema ni opće većine te da je Prijedlog zakona o dopuni Zakona o osnovama sigurnosti saobraćaja na putevima u BiH, predlažaća Doma naroda Parlamentarne skupštine BiH, odbijen.

Ad. 15. Izvještaj komisije Kolegija o nastojanju za postizanje saglasnosti o Prijedlogu zakona o postupku zaključivanja i izvršavanja međunarodnih ugovora (drugo čitanje)

Predsjedavajući je podsjetio da Kolegij nije postigao saglasnost.

U drugom krugu glasanja, Prijedlog zakona o postupku zaključivanja i izvršavanja međunarodnih ugovora je odbijen - „za“ je glasao 21 poslanik, „protiv“ 10 (iz Republike Srpske), a tri poslanika bila su „suzdržana“.

Ad. 16. Izvještaj Zajedničke komisije oba doma o usaglašavanju teksta Zakona o izmjenama i dopunama Zakona o finansiranju institucija BiH

Predsjedavajući je uvodnim napomenama podsjetio da je Zajednička komisija postigla saglasnost. Nije bilo rasprave.

Sa 32 glasa „za“ (iz Federacije BiH 20, iz Republike Srpske 12), bez glasova „protiv“ i tri „suzdržana“ glasa, usvojen je Izvještaj Zajedničke komisije oba doma o usaglašavanju teksta Zakona o izmjenama i dopunama Zakona o finansiranju institucija BiH.

Ad. 17. Informacija o radu Tužilaštva BiH za 2008. godinu (podnosilac: Tužilaštvo BiH)

Predsjedavajući je u uvodnim napomenama podsjetio da su, nakon dva pokušaja, ispunjeni uslovi za razmatranje Informacije i da glavni tužilac BiH Milorad Barašin prisustvuje sjednici.

O ovoj tački vođena je duža rasprava u kojoj su učestvovali: Šefik Džaferović, Jozo Križanović, Slavko Jovičić, Denis Bećirović, Milica Marković, Remzija Kadrić, Selim Bešliagić, Milorad Živković, Bakir Izetbegović, Niko Lozančić, Sadik Bahtić, Drago Kalabić, Husein Nanić, Rifat Dolić, Azra Hadžiahmetović, Momčilo Novaković, Martin Raguž, Branko Dokić, Sadik Ahmetović, Savo Erić,

Mirko Okolić, Hadži Jovan Mitrović, a obrazloženje Informacije, kao i odgovore na pitanja postavljena u toku rasprave dao je glavni tužilac BiH Milorad Barašin.

Prilikom glasanja, „za“ je bilo 25 poslanika (iz Federacije BiH 22, iz Republike Srpske tri), „protiv“ tri, „suzdržanih“ sedam. Zbog nedovoljne entitetske većine, predsjedavajući je odmah proveo usaglašavanje. Kolegij nije postigao saglasnost. U drugom krugu glasanja usvojena je Informacija o radu Tužilaštva BiH za 2008. godinu – „za“ je glasalo 27 poslanika, „protiv“ šest (iz Republike Srpske), „suzdržana“ dva.

U raspravi su zaključke predložili Denis Bećirović i Jozo Križanović.

Zaključci Denisa Bećirovića nisu usvojeni. „Za“ je glasalo 25 poslanika (iz Federacije BiH 23, iz Republike Srpske dva), „protiv“ tri, „suzdržanih“ sedam. Odmah je provedeno usaglašavanje zbog nedovoljne entitetske većine. Kolegij nije postigao saglasnost. U drugom krugu „za“ je bilo 25 poslanika, „protiv“ 10 (iz Republike Srpske), „suzdržanih“ nije bilo. Zaključci glase:

1. Predstavnički dom Parlamentarne skupštine BiH očekuje da Tužilaštvo BiH nastavi raditi profesionalno svoj posao u skladu sa usvojenim Zakonom o Tužilaštvu BiH.
2. Predstavnički dom Parlamentarne skupštine BiH kao najviši organ zakonodavne vlasti BiH i dalje će biti na stanovištu da svi građani BiH treba da budu isti pred zakonom, te da se zakon za sve treba primjenjivati isto bez obzira na nacionalnu, vjersku i političku pripadnost.
3. Predstavnički dom Parlamentarne skupštine BiH neće nijednim svojim postupkom uticati niti vršiti pritisak na rad Tužilaštva BiH, te stoga očekuje da taj organ svaki sudski postupak zakonito tretira i okonča na zakonom propisanim normama.
4. Predstavnički dom Parlamentarne skupštine BiH podržava nastojanje Tužilaštva BiH da se odupre svakom pokušaju političkog ili bilo kakvog drugog uticaja na rad ovog organa.

Zaključak Joze Križanovića je usvojen. „Za“ je glasalo 26 poslanika (iz Federacije BiH 23, iz Republike Srpske tri), glasova „protiv“ nije bilo, devet poslanika bilo je „suzdržano“. Odmah je provedeno usaglašavanje zbog nedovoljne entitetske većine. Kolegij nije postigao saglasnost. U drugom krugu „za“ je bilo 25 poslanika, „protiv“ tri (iz Republike Srpske), „suzdržana“ četiri. Zaključci glase:

„Organizirani kriminal i korupcija su u BiH veliko društveno zlo koje podriva ekonomske i sigurnosne temelje društva. Iz Izvještaja o radu Tužilaštva za 2008. godinu proističe da BiH nema dovoljno mehanizama niti zakonskog određenja za efikasniju borbu protiv ovog zla.“

Zbog toga Predstavnički dom Parlamentarne skupštine BiH ponovo aktuelizira ovo pitanje i traži od Vijeća ministara BiH da u roku od 90 dana uradi prijedlog zakona kojim bi se omogućilo efikasnije oduzimanje nelegalno stečene imovine i upravljanje tom imovinom.“

Ad. 18. Izvještaj o radu:

a) BHRT-a za 2008. godinu

b) Upravnog odbora RTVBiH (BHRT) za 2007. i 2008. godinu

Predsjedavajući je dao uvodne napomene.

Kratko su diskutirali Sadik Bahtić i Branko Dokić.

Izvještaj o radu BHRT-a za 2008. godinu usvojen je sa 25 glasova „za“, (iz Federacije BiH 17, iz Republike Srpske osam), dva „protiv“ i osam „suzdržanih“ glasova.

Izvještaj o radu Upravnog odbora RTVBiH (BHRT) za 2007. i 2008. godinu usvojen je sa 28 glasova „za“, (iz Federacije BiH 16, iz Republike Srpske 12), jednim „protiv“ i šest „suzdržanih“ glasova.

Ad. 19. Izvještaj o finansijskom poslovanju BHRT-a za 2008. godinu, s pregledom korekcija finansijskih izvještaja BHRT za 2007. i 2008. godinu

Predsjedavajući je dao uvodne napomene, a zatim je kratko diskutirao Sadik Bahtić.

Izvještaj iz ove tačke usvojen je sa 25 glasova „za“ (iz Federacije BiH 16, iz Republike Srpske devet), bez glasova „protiv“ i devet „suzdržanih“ glasova. Time su usvojeni i zaključci sadržani u mišljenju Komisije za finansije i budžet, koji glase:

1. **Predstavnički dom podržava preduzete aktivnosti Upravnog odbora Radio-televizije BiH vezano za izbor konsultantske firme koja će sačiniti Plan sanacije i konsolidacije Radio-televizije BiH, te zadužuje Upravni odbor da navedeni plan dostavi Predstavničkom domu u što kraćem vremenskom periodu.**
2. **Predstavnički dom Parlamentarne skupštine BiH predlaže entitetskim zakonodavnim organima da entitetske zakone o javnim RTV servisima usklade s odredbama Zakona o Javnom radio-televizijskom sistemu BiH.**
3. **Predstavnički dom Parlamentarne skupštine BiH zadužuje Upravni odbor Radio-televizije BiH da u najkraćem roku uputi zahtjev Konkurencijskom vijeću BiH kojim će tražiti ispitivanje rada marketinških agencija, u smislu sprečavanja monopola na marketinškom tržištu javnih servisa u Bosni i Hercegovini.**
4. **Predstavnički dom Parlamentarne skupštine BiH zahtijeva od Parlamenta Federacije BiH da u najkraćem roku imenuje Upravni odbor Federalne radio-televizije BiH.**

Ad. 20. Izvještaj Vijeća ministara BiH o realizaciji obaveza iz Mape puta za liberalizaciju viznog režima za građane Bosne i Hercegovine

Kao predlagač ove tačke dnevnog reda diskutirao je Rifat Dolić, a zatim je usmenu informaciju o realizaciji obaveza iz Mape puta za liberalizaciju viznog režima za građane Bosne i Hercegovine iznio predsjedavajući Vijeća ministara BiH Nikola Špirić.

U raspravi su učestvovali: Momčilo Novaković, Denis Bećirović, Jozo Križanović, Drago Kalabić, Rifat Dolić, Halid Genjac, Mirko Okolić i Branko Dokić.

Sa 27 glasova „za“ (iz Federacije BiH 18, iz Republike Srpske devet), dva „protiv“ i pet „suzdržanih“, Dom je primio k znanju usmeni izvještaj Vijeća ministara BiH o realizaciji obaveza iz Mape puta za liberalizaciju viznog režima za građane Bosne i Hercegovine.

Ad. 21. Informacija Ombudsmena za ljudska prava BiH o zatečenom stanju u 2008. godini i aktivnostima preduzetim u 2009. godini

Predsjedavajući je dao uvodne napomene, nakon kojih nije bilo rasprave.

Informacija je primljena k znanju sa 34 glasa „za“ (iz Federacije BiH 23, iz Republike Srpske 11), bez glasova „protiv“ i jednim „suzdržanim“ glasom, čime su usvojeni zaključci iz mišljenja Zajedničke komisije za ljudska prava, prava djeteta, mlade, imigraciju, izbjeglice, azil i etiku, koji glase:

1. **Informacija Ombudsmena za ljudska prava Bosne i Hercegovine o zatečenom stanju u 2008. godini i preduzetim aktivnostima u 2009. godini prima se k znanju.**
2. **Poziva se Zajednički kolegij oba doma Parlamentarne skupštine BiH da s članovima Kolegija Narodne skupštine Republike Srpske i Parlamenta Federacije Bosne i Hercegovine održi sastanak i predloži rješenja u vezi s problemima u provođenju Zakona o izmjenama i dopunama Zakona o ombudsmenu za ljudska prava, na osnovu Informacije Ombudsmena za ljudska prava Bosne i Hercegovine o zatečenom stanju u 2008. godini i aktivnostima preduzetim u 2009. godini.**

Ad. 22. Informacija o stanju sigurnosti u Bosni i Hercegovini u 2008. godini

Nakon uvodnih napomena predsjedavajućeg, kratko obrazloženje dao je ministar sigurnosti BiH Tarik Sadović, a u raspravi su učestvovali: Jozo Križanović, Slavko Jovičić, Husein Nanić i Šefik Džaferović.

Dom je, sa 28 glasova „za“ (iz Federacije BiH 19, iz Republike Srpske devet), dva „protiv“ i pet „suzdržanih“, primio k znanju Informaciju o stanju sigurnosti u Bosni i Hercegovini u 2008. godini. Time su usvojeni zaključci iz mišljenja Zajedničke komisije za odbranu i sigurnost, a Dom je usvojio i zaključke koje su u raspravi predložili Slavko Jovičić i Husein Nanić.

„Za“ zaključak Slavka Jovičića glasalo je 20 poslanika (iz Federacije BiH 15, iz Republike Srpske pet), „protiv“ jedan, „suzdržanih“ 14.

„Za“ zaključak Huseina Nanića glasala su 22 poslanika (iz Federacije BiH 19, iz Republike Srpske tri), „protiv“ jedan, „suzdržanih“ pet. Odmah je provedeno usaglašavanje zbog nedovoljne entitetske većine. Kolegij nije postigao saglasnost. U drugom krugu zaključak je usvojen sa 25 glasova „za“, četiri „protiv“ (iz Federacije BiH jedan, iz Republike Srpske tri), „suzdržanih“ šest.

Usvojeni zaključci glase:

1. **Od Vijeća ministara BiH zahtijeva se da sačini plan mjera za rješavanje sigurnosnih pitanja i o tome dostavi informaciju Zajedničkoj komisiji i domovima Parlamentarne skupštine BiH.**
2. **Radi rješavanja pitanja i problema i predlaganja mjera iz oblasti sigurnosti navedenih u Informaciji, obavezuje se Zajednička komisija da organizira posebnu sjednicu s ministrom sigurnosti BiH, njegovim saradnicima, te direktorima sigurnosnih agencija BiH, uključujući i direktora BHMACH-a. Pitanja obrađena informacijom bit će detaljno razmatrana potom i na konferenciji o stanju sigurnosti, koju će Zajednička komisija organizirati u skladu sa usvojenim Radnim planom za ovu godinu.**
3. **Zadužuje se Vijeće ministara BiH da svakih 90 dana dostavlja Predstavničkom domu informaciju o stanju sigurnosti u zemlji.**
4. **Zadužuje se Ministarstvo sigurnosti BiH da uradi plan aktivnosti s ciljem poboljšanja stanja u oblasti krivičnih djela krađe automobila. Rok za izradu plana aktivnosti je 30 dana.**

(Zaključci br. 1. i 2. usvojeni su na prijedlog Zajedničke komisije, zaključak br. 3. na prijedlog Slavka Jovičića, a zaključak br. 4. na prijedlog Huseina Nanića.)

Ad. 23. Informacija Ministarstva sigurnosti BiH o stanju sigurnosti novinara u Bosni i Hercegovini (realizacija usvojenog zaključka sa 47. sjednice Doma, održane 4. marta 2009.)

Predsjedavajući je podsjetio da je ova tačka uvrštena na inicijativu Denisa Bećirovića i da je na prošloj sjednici skinuta s dnevnog reda zbog odsustva ministra sigurnosti.

U okviru ove tačke diskutirao je Denis Bećirović.

Informacija je primljena k znanju sa 28 glasova „za“ (iz Federacije BiH 19, iz Republike Srpske devet), bez glasova „protiv“ i sedam „suzdržanih“ glasova.

Denis Bećirović je u raspravi predložio dva zaključka o kojima se glasalo odvojeno. „Za“ zaključak br. 1. glasalo je 27 poslanika (iz Federacije BiH 23, iz Republike Srpske četiri), glasova „protiv“ nije bilo, a „suzdržanih“ je bilo osam. Predsjedavajući je proveo usaglašavanje. Kolegij nije postigao saglasnost. U drugom krugu zaključak je usvojen sa 26 glasova „za“, jednim „protiv“ (iz Republike Srpske) i sedam „suzdržanih“.

Zaključak br. 2. usvojen je sa 29 glasova „za“ (iz Federacije BiH 23, iz Republike Srpske šest), tri „protiv“ i tri „suzdržana“ glasa. Zaključci glase:

1. **Predstavnički dom Parlamentarne skupštine BiH zadužuje Ministarstvo sigurnosti BiH da u roku od 30 dana dostavi informaciju o sankcioniranju izvršilaca verbalnih i fizičkih nasrtaja na novinare u BiH.**
2. **Predstavnički dom Parlamentarne skupštine BiH zadužuje Ministarstvo sigurnosti BiH da u roku od 30 dana dostavi Prijedlog mjera s ciljem sprečavanja verbalnih i fizičkih prijetnji novinarima u BiH.**

Ad. 24. Potvrđivanje odluka predsjedavajućeg Vijeća ministara BiH o imenovanju:
a) Mladena Simića za zamjenika ministra komunikacija i prometa BiH,
b) Živka Marjanca za zamjenika ministra odbrane BiH za politiku i planiranje.

Predsjedavajući je podsjetio da su ispunjeni svi preduslovi za razmatranje Odluke predsjedavajućeg Vijeća ministara BiH, a zatim je pročitao Odluku.

Diskutirao je Martin Raguž, a kratko obrazloženje Odluke dao je predsjedavajući Vijeća ministara BiH Nikola Špirić.

Dom je, sa 26 glasova „za“ (iz Federacije BiH 17, iz Republike Srpske devet), dva „protiv“ i sedam „suzdržanih“, potvrdio odluke predsjedavajućeg Vijeća ministara BiH, a zatim su Mladen Simić i Živko Marjanac položili svečanu zakletvu.

Ad. 25. Imenovanje članova u Posebnu istražnu komisiju (zaključak usvojen na 52. sjednici Doma, održanoj 29. aprila 2009.)

Predsjedavajući je u uvodnim napomenama podsjetio da su, s ciljem realizacije zaključka sa 52. sjednice, po kojem „Predstavnički dom Parlamentarne skupštine BiH osniva Posebnu istražnu komisiju u kojoj će biti zastupljen po jedan predstavnik svake političke stranke u ovom domu“, klubovi poslanika pozvani da odrede po jednog predstavnika za člana komisije, a ostali poslanici, koji nisu u sastavu klubova, automatski će biti članovi komisije i dodao da svoje predstavnike do današnje sjednice nisu predložili SDA i SNSD.

Bakir Izetbegović je, u ime SDA, predložio Sadika Ahmetovića.

Drago Kalabić predložio je sljedeći zaključak:

„Predstavnički dom odgađa osnivanje Posebne istražne komisije (veza: 01-50-1-15-52/09 – Zaključak br. 2. Predstavničkog doma sa 52. sjednice, održane 29.4.2009.) do okončanja postupka i radnji koji se po istom pitanju provode u nadležnim institucijama BiH.“

Zaključak nije usvojen – „za“ je glasalo 12 poslanika, „protiv“ 16, „suzdržanih“ sedam.

Nakon što Dom nije usvojio zaključak, Klub SNSD-a je za člana Posebne komisije iz ove tačke predložio Milicu Marković.

U Posebnu istražnu komisiju, sa 33 glasa „za“ (iz Federacije BiH 22, iz Republike Srpske 11), bez glasova „protiv“ i dva „suzdržana“ glasa, imenovani su: Sadik Ahmetović (SDA), Adem Huskić (SBiH), Milica Marković (SNSD), Denis Bećirović (SDP), Slavko Matić (HDZ BiH), Vinko Zorić (HDZ 1990), Mirko Okolić (SDS), Branko Dokić (PDP), Hadži Jovan Mitrović (DNS), Sefer Halilović (BPS), Rifat Dolić (DNZ) i Jerko Ivanković Lijanović (NS Radom za boljitak).

Ad. 26. Izjašnjavanje Doma o prijedlogu Zajedničkog kolegija oba doma Parlamentarne skupštine BiH da se kolegiji oba doma obrate visokom predstavniku za BiH radi davanja mišljenja o Zaključku Zajedničke komisije za ljudska prava, prava djeteta, mlade, imigraciju, izbjeglice, azil i etiku

Predsjedavajući je podsjetio da je Zajednička komisija za ljudska prava, prava djeteta, mlade, imigraciju, izbjeglice, azil i etiku, prilikom razmatranja delegatskog pitanja Slobodana Šarabe koje se odnosilo na lica smijenjena odlukama visokog predstavnika za BiH, usvojila sljedeći zaključak: „Od Parlamentarne skupštine BiH traži se pokretanje inicijative prema Uredu visokog predstavnika za preispitivanje svih odluka visokog predstavnika kojima su smijenjena određena lica ili da visoki predstavnik donese odluku kojom će to ovlaštenje prenijeti na Instituciju ombudsmena za ljudska prava BiH ili neku drugu instituciju.“ Ovo pitanje razmatrano je na sjednici Zajedničkog kolegija, a kako nije postignut konsenzus, odlučeno je da se domovi izjasne o prijedlogu Zajedničkog kolegija oba doma Parlamentarne skupštine BiH da se kolegiji oba doma obrate visokom predstavniku za BiH radi davanja mišljenja o Zaključku Zajedničke komisije za ljudska prava, prava djeteta, mlade, imigraciju, izbjeglice, azil i etiku.

Nije bilo rasprave.

Sa 24 glasa „za“ (iz Federacije BiH 13, iz Republike Srpske 11), sedam „protiv“ i tri „suzdržana“, Dom je prihvatio prijedlog Zajedničkog kolegija oba doma Parlamentarne skupštine BiH da se kolegiji oba doma obrate visokom predstavniku za BiH radi davanja mišljenja o Zaključku Zajedničke komisije za ljudska prava, prava djeteta, mlade, imigraciju, izbjeglice, azil i etiku.

Ad. 27. Davanje saglasnosti za ratifikaciju:

- a) Sporazuma o ekonomskoj saradnji između Vijeća ministara BiH i Vlade Republike Srbije,
- b) Sporazuma između Vijeća ministara BiH i Vlade Crne Gore o provođenju graničnih provjera na zajedničkim graničnim prijelazima,
- c) Aneksa II. Sporazuma između Bosne i Hercegovine i Kraljevine Norveške o finansiranju projekta u korist pravosuđa i/ili sudova i tužilaštava u BiH,
- d) Dodatnog protokola uz Krivičnopravnu konvenciju protiv korupcije (ETS 191), Strasbourg, 15. maja 2003.,
- e) Evropske konvencije o obavještenjima o stranom pravu s Dodatnim protokolom,
- f) Amandmana na Konvenciju o osnivanju Vijeća za carinsku saradnju,
- g) Protokola između Ministarstva sigurnosti BiH i MUP-a Republike Srbije o provođenju zajedničkih patrola uz zajedničku državnu granicu,
- h) Protokola između Ministarstva sigurnosti BiH i MUP-a Republike Srbije o održavanju redovnih sastanaka predstavnika na državnom, regionalnom i lokalnom nivou.

Predsjedavajući je podsjetio da je Komisija za vanjske poslove dala pozitivno mišljenje o davanju saglasnosti za ratifikaciju sporazuma iz ove tačke. Obavljeno je jedinstveno glasanje. Saglasnost za ratifikaciju svih sporazuma data je jednoglasno – 35 glasova „za“ (iz Federacije BiH 23, iz Republike Srpske 12).

Time je realiziran dnevni red.

Predsjedavajući je podsjetio da će 56. sjednica Doma biti održana 24. juna, 57. - 8. jula, a 58. sjednica 22. jula 2009.

Također, predsjedavajući je obavijestio Dom da će 3. posebna zajednička sjednica oba doma Parlamentarne skupštine BiH o temi: „Delegati/poslanici pitaju – Vijeće ministara BiH odgovara“ biti održana 14. jula 2009.

Sjednica je završena u 18,10 sati.

Sastavni dio Zapisnika je transkript 55. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSEDVAJUĆI
PREDSTAVNIČKOG DOMA
Beriz Belkić